

## **OSUMNJIČENI IZ RUANDE SUOČENI SA ZAHTJEVOM ZA EKSTRADICIJU**

**Author:** [IWPR](#)  
[ICTY](#)

Piše: Caroline Tosh iz Haga (TU br. 484, 12. januar 2007.)

Naime, Ruanda je zatražila ekstradiciju četvorice svojih državljana koje je britanski sud zadržao u pritvoru, a koji se terete za učešće u genocidu počinjenom 1994.

Vinsent Bajinja (Vincent Bajinya), Čarls Munjijanez (Charles Munyanez), Selestin Ugirašebuja (Celestin Ugirashebuja) i Emanuel Ntezirjajo (Emmanuel Nteziyayo) pojavili su se 29. decembra pred vestminsterskim nižim sudom u Londonu.

Oni su uhapšeni u racijama koje su širom Britanije izvedene 28. decembra, da bi potom porekli optužbe za genocid koje se odnose na pokolj oko 800,000 Tutsija i umjerenih Hutua u Ruandi.

U nalogima za ekstradiciju oni se optužuju za ubijanje, te pomaganje i podsticanje ubijanja Tutsija u periodu od 1. januara do 12. decembra 1994., odnosno za zločine počinjene „sa namjerom da se u cjelini ili djelimično uništi navedena grupa“.

Hapšenja su uslijedila nakon što su Britanija i Ruanda potpisale specijalni sporazum, kojim se Ruanda saglasila da neće zahtijevati smrtnu kaznu ukoliko osumnjičeni budu osuđeni.

Britanski zakon ne dopušta ekstradiciju u zemlje koje primjenjuju smrtnu kaznu.

Bajinja je promijenio ime u Vinsent Braun (Vincent Brown) i postao Britanac; uhapšen je u sjevernom Londonu i tereti se za koordinaciju Hutu milicije u ruandskoj prijestonici Kigali tokom 1994.

Munjijanez je uhapšen u Bedfordu, a riječ je o lokalnom gradonačelniku koji je navodno isplanirao pokolj više desetina hiljada Tutsija.

Ugirašebuja je uhvaćen u Eseksu i takođe je nekadašnji gradonačelnik. Optužen je za postavljanje barikada kako bi se spriječilo bjekstvo Tutsija.

Ntezirjajo je, opet kao bivši gradonačelnik, u pritvor dospio u Mančesteru, a optužen je za prisustvo na sastancima na kojima je pokolj Tutsija isplaniran.

Ruandski tužilac, general Martin Ngoga, pohvalio je Britaniju zbog hapšenja optuženika i pozvao ostale zemlje koje navodno pružaju utočište osumnjičenicima za genocid da slijede njen primjer.

Ukoliko budu izručeni, četvorica optuženika neće biti procesuirani pred Međunarodnim krivičnim sudom za

Ruandu (MKSR), koji bi trebo biti zatvoren 2010.

Grupa za zaštitu ljudskih prava, Amnesti Internešenel (Amnesty International), izrazila je zabrinutost da osumnjičeni za ratne zločine u Ruandi neće imati pravedno suđenje.

Sudeći prema agencijskim izvještajima, okrivljeni će se pred sudom ponovo pojaviti 26. januara.

Caroline Tosh izvještava za IWPR iz Haga.

**Focus:** Medunarodni krivicni sud za bivsu Jugoslaviju

---

**Source URL:** <https://iwpr.net/sr/global-voices/osumnjiceni-iz-ruande-suoceni-sa-zahtjevom-za>